

Schenkungen und Verkäufe ans Kloster, zu denen aber bei Lehensgut der Herr zugestimmt haben muss, und verzichtet auf die angegebenen, dem Reiche zustehenden Rechte.

1210 Juni, Turin.

In nomine sancte et individue trinitatis. Otto quartus divina favente clemencia Romanorum imperator et semper augustus.

Ad presentis vite statum prosperum atque beatitudinis eterne requiem adipiscendam nobis plurimum speramus proficere, si hiis operam dedimus, que saluti ecclesiarum dei expedire noverimus et quieti. Qua sane consideratione inducti notum facimus universis presentem paginam intuentibus, quod nos ad supplicationem fidelis nostri Iacobi Ripaltensis ecclesie prepositi ipsum eandemque ecclesiam, que in honorem beatorum apostolorum Petri et Andree constructa est et dedicata, cum universis personis inibi deo servientibus et omnes res tam mobiles quam immobiles ad eandem ecclesiam pertinentes et omnia animalia et universa ad supradictam ecclesiam pertinentia, ubicunque sunt vel acquirere iuste poterint, in nostre magestatis protectionem ac deffensionem suscipimus. Ad augmentum quoque favoris nostri et gracie nostre eidem ecclesie demonstrandum tam prenominato preposito quam eius canonicis supradicte ecclesie professionem facientibus calumpnie remittimus sacramentum, ita quidem quod illud in propriis personis facere aut exercere nullatenus cogantur, sed sindicum seu procuratorem possint substituere, qui vice ipsorum in suam, ipsius sindici, iuret animam. Preterea si quis homo divina compunctus inspiratione de alodio suo vel feudo, domino concedente, vel de rebus propriis aliquid eidem ecclesie conferre voluerit aut contulit aut vendere intendit, salvo iure nostro liberam in hoc habeat facultatem. Insuper donamus et concedimus quidquid ad nostrum imperium iure pertinere dignoscitur, liberaliter remittentes areas vel decursus aquarum, piscationes, transitus viarum, silvas cultas et incultas comunes et pascua comunia eis damus et concedimus ad pascuandum. Quod ut verius credatur, presentem inde cartam conscribi et nostre magestatis bulla iussimus insigniri, statuentes et imperiali auctoritate precipientes, ut nulla omnino persona humilis vel alta, secularis vel ecclesiastica, sepedictam ecclesiam in personis aut rebus presumat molestare aut aliquibus iniuriis afficere. Quod qui facere attemptaverit, in ulcionem temeritatis sue quinquaginta libras auri componat, medietatem camere nostre, partem residuam dicte ecclesie.

Huius rei testes sunt Ariprandus Vercellensis episcopus, Iacobus Taurinensis episcopus, Guido Astensis episcopus, Wilielmus marchio Montisferrati, Manfredus marchio de Saluciis, Galfredus iudex de Trivicella, Petrus de Ranfredo et alii quamplures.